

Parlamentario independiente Booshi Wever riba su propio partido

Partido UPP kier traha riba union di e pueblo Arubano

ORANJESTAD – Union Patriotico Progresista ta un partido nobo y diferente di e partidonan politico na Aruba. Aunke ta pronostica cu e lider di e partido UPP ta bira Sr. Booshi Wever, toch e parlamentario ta di pensamiento cu nan ta un partido completamente otro. Loke cu Booshi Wever kier logra cu e partido nobo, ta kibra cu poco tradicion cu Aruba ta bay keda beneficia di dje. Union Patriotico Progresista ta kere den cambio y nan ta sigur cu nan por haci esaki.

UNION

Union ta un aspecto hopi importante pa e partido. Partido UPP kier crea e sentimiento den pueblo di Union. E sociedad a bira uno hopi

dirigi riba “ami”. Partido UPP kier crea den tur hende na Aruba e sentimiento di “nos”. “Pueblo mester por sinti cu nan ta parti di un proceso”, Booshi Wever a remarca. Banda di concentra riba union, tambe kier traha pa e progreso di e pais. Como partido politico esaki mester ta e prome y e unico meta. Tambe mester traha riba un pais cu ta un patria, mesun cos cu un cas ta un hogar pa un famia.

LOGO

E logo di e partido ta colorido y e ta enfatisa e origen di e Arubiano cu ta indjan. E indjanan tabata tin un bisti hopi colorido. Tambe e ta ilustra e composicion di e comunidad. Tin hopi

hende di diferente rasa, color politico, religion of otro nacionalidad cu ta den e union aki.

IDEAL

E ideal nan cu e partido ta resorta bou di dje ta social democrata. E ser humano ta central den e proceso aki. Hopi biaha ta haya cu partidonan ta carga e titulo di social democrata, pero tin e tendencia di ta hopi contra comercio y no ta duna hopi balor na esaki. Den e statuut di UPP a pone enfaticamente cu comercio y sector priva ta bay tin un luga special den cu-alkier maneho ora cu UPP carga e maneho gubernamental. Pero primordial ta e ser humano y e pais cu su pueblo ta haya e prioridad. □